



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 8

Taoba Thailand PM Thaksin Shinawatra Deobarnü chioktsü

Asian Indoor Athletics Championships: Jyothi-i gold medal angu



VOL. XXI ISSUE NO. 126 (ADOK 126) DIMAPUR AMUNGNÜ (SUNDAY) TSÜKLAI (FEBRUARY) 18, 2024 ₹ 5.00

Meghalaya BJP VP-i Assam nung Khristantem kümzüka ayutsü ayongzük

Shillong, February 17, 2024 (Agencies): Meghalaya BJP vice president Bernard Marak-i Assam chief minister Himanta Biswa Sarma dang par state nung Khristantem kümzüka ayutsü ayongzükogo.

Assam Hindutva lennir Satya Ranjan Borah-i Khristantem anema jembiba, amakba, jashidaktsüba, amokmerenba aser ozüing alema inyaksangshiba osangtem social media ajanga angashiba sülen Meghalaya BJP vice president Marak-i Assam CM Sarma dangi shidi ka zülü.

Borah-i missionary rejutem dak tenük yoka mapa inyaker aser iba ajanga telok balala tsüingda mepetmesü adokdaksür. Missionary rejutemi shisaliok aser lokti renloktsü atema inyaker ta Bernard Marak-i ashi.

Assam nung Khristantem lendongi aitsüsa aser tetsübu tensa ka nung lir anungji Christian

missionary rejutem nung security akangshitsüla aser ketdangsürtemi prohibitory orders metetdaksütsüla, ta paisa shidi nung shia lir.

Assam nung Khristantemi lapokba shisaliok rejutem nem timtem agütsüba aser mapa tamajung inyakba aitsür ta Khasi Jaintia Christian Leaders Forum (KJCLF)-ia metetdaksüo.

Assam assembly nung 'magical' healing atema ozüing yangluba ajanga tamangba yimsü nüjiso nung kongshir. Shia metetba Assamese nungeri külen tsütsü shir aser tesempatep adoktsü atema inyaker anema noktaksüla. Shisaliok rejutem aser tesayurtem kümzüka ayutsüla, ta KJCLF-isa metetdaksüo.

KJCLF-isa tsüraburtem aser nübortemi shisaliok angazükba rejutem aser tesayurtem kümzüka ayutsü atema ayongzükogo.

Eastern Army Commander-i Manipur semdang

Imphal, February 17, 2024 (Agencies): Indian Army nung General Officer Commanding-in-Chief of the Eastern Command Lt. Gen. Ram Chander Tiwari-i Honibarnü Manipur kübok Indo-Myanmar arrtsülen tensa osang metetpelaogo.

Honibarnü GOC Lt. Gen. Ram-i Imphal East district kübok Pukhao tesemtem nung tensa osang metetpelaia liasü.

Manipur nung kin o kin tsüingda mapang shia khatepba mapang ka nung pai law & order tensa meyipa reprangshitsü atema semdang.

GOC RC Tiwari-i Hokolbarnü

Tengnoupal district kübok Moreh aser Churachandpur district kübok Beheng semdanga liasü.

GOC-i Manipur nung mapa lemezüka aliba Army ajak dang mapa tajung inyakba atema tenüngsang agütsü aser paisa Civil Society Organisations züingsemtem den sensaksema liasü.

Moreh nung senden amendang Kuki Inpi, HTC, Kuki Women Union and Human Rights, Kuki Chiefs Association, Gorkha Union, Manipur Muslim Union, Chamber of Commerce Moreh aser Tamil Sangam nungji teshimtet nübotem aden.

Rahul & Priyanka nati nübo yimtsütsü

Agartala, February 17, 2024 (Agencies): Taküm Lok Sabha elections mapang Congress lennir Rahul Gandhi aser AICC General Secretary Priyanka Gandhi nati North East nung INDIA bloc candidate tem atema nüboyimtsütsü.

Rahul Gandhi-i Bharat Jodo Nyay Yatra agidar aser tang pai iba sentong Uttar Pradesh nung agir. Priyanka Gandhi-i Tripura semdangtsüba sentong liasü saka la tanga mapatem ajanga mesemdangte lir, ta Congress lennirtemi ashi.

Lok Sabha elections nüboyimba maparen tenzükba sülen tenaprongi Tripura aser tanga North East state tem semdangtsü ta parnoki ashi.

"Rahul aser Priyanka nati Tripura semdangtsü aser party züingsemtem ajungmesotsü" ta TPCC President Asish Kumar

Saha-i Honibarnü ashi.

"Panchayat level nungi state sorkar ketdangsübaren nung Bharatiya Janata Party (BJP)-i ochimashi mapa inyaker. Nübortem tebilemstü mangashir kechiyong Tripura nung BJP-i one-party rule benoktsü meranger" ta Saha-i osangbener dang ashi.

BJP lennirtemi drug lords den külemi yariteper aser Tripura ya drug corridor ka kümdaytsüo. MLA kari iba mapa inyakba atema tenüng tetshir. Külen Chief Minister-ibo Nisha Mukta Tripura ta ashir saka par party lennirtemi ozüing alema drugs shibelener, ta paisa tai tongloksü.

Osangbener senden nung Congress lennir aser North East communication in charge advocate Mathew Anthony-ia o jembidang BJP aser parnok policy tem aitsü.

Dimapur, February 17, 2024 (TYO): Nagaland Baptist Church Council (NBCC)-i February 24, 2024 nü ghonda 12 sarasademtsü ayongzük.

Honibarnep 6:00 ako nungi nikongdang 6:00 ako tashi sarasademtsü ayonger ta NBCC General Secretary Rev. Dr. Zelhoh Keyho-i sangdong ka nung ashi.

"Asenok külemi sarasademba ajanga Khristantemi longjema tali sayutsü atema iba sentong ayongzük. Tanü asenok mapang tamajung ka nung alir aser asen loktiliba nung telemsa kanga adoker. Medemertem aser kinungertem tsüingda tepila adoker anungji arogotemi sarasademtsü aser lumitsü kanga nüngdaka kümogo. Asenok sendaktep dang asenoki Tsüingrem den sarasadem agi sendaktepdi aser asen temepishiba Pa nem angashidaksüdi" ta NBCC-i ayongzükogo.

NBCC-isa arogotem aser arogopurtem dang Tsüingrem tsüingdang ajemalutsü aser

Tsüingrem bushitsü sarasademtsüdi.

8. Board exams aser ano tanga tatidang balala agütsüba asen tanurtem atema sarasademtsüdi.

9. Asen missionary tem tesem balala nung timtema inyakertem asoshi sarasademtsüdi.

10. Reshikangshi tia ajuruba arogotem aser tamangertem asoshi sarasademdi.

11. School azüingertem aser school züingnüaka mezüingtetba asen tanurtem atema sarasademtsüdi.

12. Tesayurtemi asen tanurtem timi anitetsüsa nendaka inyaksü atema sarasademdi.

13. Asen lanurtemi taküm timi libaliroa aotsü atema sarasademtsüdi.

14. Asen aluyimertem metsüh prokba aser atemba mongpu atema temoatsü meshitsüdi.

15. Alima nung yimjung alitsü aser rara o mangatettep adoka aliba linüktem atema sarasademtsüdi.

16. Tamangertemi Lai o tesayuba ama tamang asentenshitsü atema sarasademdi.

February 16 nü NLA Deputy Speaker agitsü

Kohima, February 17, 2024 (DIPR): February 26, 2024 nü Nagaland Legislative Assembly nung Deputy Speaker election agitsü.

Rules of Procedure and Conduct of Business nung

ajemdaker NLA Speaker-i iba election agitsü anogo shimogo.

Date of filing nomination papers: 19th -21st February, 2024; Time: 11:00 A.M. to 3:00 P.M.

Date of Scrutiny: 22nd

February, 2024; 11:00 A.M. onwards.

Date of withdrawal: 23rd February, 2024; Time: 12:00 Noon to 3:00 P.M.

Date of Election: 26th February, 2024.

Churachandpur nung documents ajak samatsütsü tasa atonga inyak

Imphal, February 17, 2024 (Agencies): Imphal East district kübok Chingarel Tejpur nung prangpong rakzüka bener aoba aser Churachandpur nung mepetmesü tatalokbatem magisterial enquiry asütsü ta Chief Minister N Biren Singh-i ashi.

Churachandpur nung nisung takümtem samaba aser Manipur Police Training College, Pangei o 5th IRB, Chingarel nungi prangpong rakzüka bener aoba atema sasa bilemer aser sorkari item tatalokba khukhua aitsür ta CM Biren-i ashi.

Chingarel nung prangpong rakzüka bener aoba sülen police 7 mapa nungi anentsü kechiyong parnok ya iba tatalokba den sendaktepa lir ama temulung malemer. Churachandpur district SP-ia noksa aser video kar anguba sülen police constable ka mapa nungi anentsü, ta Biren Singh-i ashi.

Ajisüaka mapa nungi anentsüba meyipa agitsü akok mesüra temaba bangdakpur dangi meyipa agitsü atema abentsü

akok, saka iba ya meinyaker nisung kari SP office aser DC office den DC bungalow rongdoktsü.

Iba tatalokba nung nisung 4 tepset aser aika yiru. MPTC nunga nisung ka tepset aser aika yiru. Sorkari item tatalokba ana atema magisterial enquiry asütsü ta CM Biren-i ashi.

Sorkari magisterial enquiry asüba den külemi nisung kati social media (X) ajanga nisungtem ajungmesoba atema FIR ka benoktsü. Churachandpur district nung atalokba lendong ya iba tweet osang den sendaktepa alitsü akok ta paisa metetdaksü.

Iba kasa aonung 8.27 ako meta iba nisung indang personal account nungi tweet ka asü aser iba sülen aonung 10:00 ako meta nungi nisung telok kati mi senoktsü.

ITLF-i Churachandpur DC aser SP amokerenba atema asüingdangdang "iba telok anema FIR benokogochiyong nisung shingai sorkar ketdangsürtem amokmeren asütsü makok. State ajunga Churachandpur DC aser

SP sülen lir. Parnok nisung taküm aser kiojen kümzüka ayutsü tebilemstü khuret bona lir" ta CM Biren-i langzü.

"Churachandpur nung tawa lendong atalokba ya documents ajak samatsütsü asoshi jelia renemba sentong ka ama temulung malemer. State sorkari ozüing alema arurtem jangjatsü atema base year ji 1961 asütsü ta metetdaksüo. Iba atema parnok DC office amak asütsü akok saka state sorkar ket nung master copies ajunga lir" ta paisa ashi.

"Parnoki state security arms aser ammunition agütsür saka shinga mapa nungi manentsü. Parnoki nisung telok anir Imphal nung Kuki colony tem rongdoktsür saka parnok dak kecha meinyaker. Kuki volunteers den külemi police personnel ka video angu aser pa mapa nungi anentsü. Iba ya timi ketdangsüba state ka asü?" ta Saikot assembly constituency nungi BJP MLA Paolienlal Haokip-i X nung metetdakja liasü.



February 17 nü Community Hall Lower Forest Colony, Kohima nung New Minister Hill, Agri Forest, Electrical, Para Medical, aser PR Hill Jail Colony nungi lenirtem aser NCAP, ZUB ZUB India nunger senden amenba mapang tangokba noksa nung angur.

BJP Mkg-i PM Vishwakarma scheme atema beneficiary tem jaoker

Mokokchung, Tsüklai/February 17 (TYO): PM Vishwakarma (Modi 1 Lakh Loan Scheme) atema tenüing züingoksema maparen Mokokchung BJP Office nung inyakdar aser taruba hopta tashi inyaksangshitsü.

PM Vishwakarma Yojanais ya, Vishwakarma (craftsman) lokti nungi artisans aser craftsmen tem ajungkettsü atema teyari agütsütsü asoshi India sorkar inyakyim ka lir.

Iba ya Ato Kilonser Narendra Modi kübok Centre sorkar indang flagship sentong ka lir aser iba ya linük nung employment scheme tulutiba rongnung ka lir. Union Finance Minister, Nirmala Sitharaman-i, iba scheme atema sen crore 13,000 lemezütsüogo.

Linük ajunga den jangyumedema BJP Mokokchung-ia, district nung

temsüa aliba beneficiary tem tenüing züingoksemsü atema iba inyakyim benoka inyakdar.

Iba scheme ajanga India nunger kibong/lisopur ajak ayimjemer. Ajisüaka kibong ka nungi nisung ka dang tenüing züingoksemtetsü. Kasa mapang nung beneficiary ya sorkar tenzüker ka masütsüla mesüra par kibong nung sorkar tenzüker ka danga malitsüla. Maneni beneficiary ya bank mashi ka nungi loan agia alir ka mesüra loan magütsür ka masütsüla.

Iba scheme ajanga wadang balala nung mapa mongui aliba artisans; carpentry, molok ataker, kioktsü yanglur, sü arür, doll aser tory yanglur, tsüingsem arür, nok atsünger, mason, poateper amala nem teyari agütsütsü.

Tenüing züingoksema tembangba sülen, Centre sorkar aser sorkar indang nodal agency

temi züingsoksema aliba beneficiary tem indang tenüing asadangtsü aser linük ajunga nung iba scheme benoka inyaktüsü.

Tejangrartemi BJP Mokokchung Office, Arkong Ward office mapang (10 a.m.-3.p.m) semdangtetsü. Tenüing züingoksemsü atema Aadhaar Card, Voter ID, PAN Card, Permanent Residential Certificate, Bank Passbook photocopy kaka aser passport size noksa anana nüingdaktüsü. Tenüing züingoksemsü atema sen 300 agitsü.

BJP Mokokchung District-i, Mokokchung district nung alirtem iba scheme atema tenüing züingoksema scheme ajanga agütsüba tajangzüktem agitsü jaoker, ta PM Vishwakarma Committee, Convener Rongsenyangeri sangdong ka ajanga metetdaktüsü.

Mizoram nung oset sen crore 130 alang puogo

Aizawl, Tsüklai/February 17 (Agencies): Assam Rifles-i Mizoram nungi January nungi tang tashi nung anogo 45 tsüingda heroin aser kanga bulua manguba shirurudem densema tanga tenokdangba agütsür aliba oset sen crore 130 alang puogo, ta ketdangsür kati Hokolbarnü metetdaktüsü.

January nungi meita aoba sentong balala ayongzüka agiba mapang Assam Rifles-i heroin seret pezü, Methamphetamine tablets lakh 3.3 aser tanga tenokdangba agütsür aliba osettem sen crore 130 alang

puogo, ta IGAR (East) Public Relations Officer (PRO)-i sangdong ka ajanga metetdaktüsü.

Paramilitary force yagisa, Bodhbarnü Mizoram-Myanmar arrtsü nung Champhai district kübok Zokhawthar tesem meita aoba mapang temesepba mozü ayoker ka ket nungi sen crore 3.36 alang heroin gram 480 pua liasü.

Kasa mapang nung Mizoram Excise and Narcotics Department ketdangsürtemi Brehostibar aser Hokolbarnü Aizawl nung meita aoba

sentong balala ana ayongzüka agiba mapang ganja (cannabis) seret 19 puogo, ta department-i sangdong ka ajanga metetdaktüsü.

Tenokdangba oset bener aliba atema Assam nung alir ka densema nisung asem tashi puogo, ta parnokisa metetdaktüsü.

Parnok asem ya Narcotic Drugs & Psychotropic Substances Act 1985 kübok section tapet dak ajemdaker aitsüogo aser Hokolbarnü obendangtsü atema magistrate dangi anirogo, ta kasa sangdong ajanga metetdaktüsü.

AR-i NSCN-K Isak züingsem ka apu



Dimapur, Tsüklai/February 17 (TYO): Zunhebhoto kübok tesem kar nung telungpur züingsem ka munga aliba indang osang tejangja ka angazükba sülen Assam Rifles Launched-i January 15 nü meita


aoba sentong ka ayongzüker aser Nscn-K Isak telok nungi züingsem ka pua liasü.

Iba nisungba ket nung ozüing alema amshiba hadirtem, injang stamp, seal aser rakzürakdemtsü

atema amshiba kuli kaketteb bener liasü.

Aija alisang aser pa ket nungi ngutetba hadir aser kuli kaketeb tem ya police nem bendanga agütsüogo.

TSÜNGREMER TAOCHI NUNG KÜM 103 AJUNGER



Tanü February 18, 2024 anogo nung ozü tsürabur **Wt. Imsüwala Imchalar** (Akhoya) taküm tajung lia arishi küm 103 ajungba takok aser temoatsü asoshi Tsüngrem tenüing asanger.

Oja, nai Tsüngrem tsübua ochi nung aliba ajanga Tsüngremi arishi talang moatsüogo. Na onok chinur aser semchirsemmurtem asoshi temoatsüba tetsü ka aser akhümdong lir. Ano maneni Tsüngremi ojala nem anema aliba taküm aser arishi küm tasen aika moajangma ta onoki sarasademer.

"Happy Birthday, Oja aser Otsü"

- Temeim Chirnur, Semchirsemmur aser Kinungertem.

CANSSEA inti senden ayonger

Dimapur, Tsüklai/February 17 (TYO) Confederation of All Nagaland State Services Employees Association (CANSSEA) Annual General Body Meeting (GBM) February 20 nü CANSSEA conference hall nung 12 ako nungi tenzüka amentsü.

CANSSEA District Unit tem Nyusou-i sangdong ka ajanga nungi Executive züingsem anana metetdaktüsü.

asir züingoksema aliba Department ajak nungi Nodal officer tem iba senden nung arua shilem agitsü metetdaktüsügo. Metetdaktüsüba ama iba senden nung ajaki tamakok maludaktüsü arua shilem agitsü atema CANSSEA Press & Information Secy Siewatho

Longmisa yimtak Longmisa Putu Yimsüsürtem temeja shisatokden aka



Longmisa yimtak Longmisa Putu Yimsüsürtem temeja shisatokden akadang shisalen sayur Dr.Martemjen-i jembir aser sentong nung adener Putu Yimsüsürtem noksa nungji angur.

Mokokchung, February/ Tsüklai 17(TYO): Tanu teburchi yimsüsür,ochishir, Longmisa yimtak Longmisa mapa meranga inyakba, Putu Yimsüsürtem temeja tazüokba akaba,nüktapangta shisatokden sentong tajung ka "Temelenshi Putu nung Yimsüsüba Pangdak" ta asüba yimya awashi tajung aketba, o omen nung ajemdaker longmisa Baptist Arogo-i ayongzüka kaogo.

Longmisa yimtak tang ya Kosasanger Putu menden yimsüsüba putu lir aser tanu Longmisa Putu Yimsüsürtem Iba shisatokden sentong temeja shisatokden Putu tenzüka Longmisa Baptist Gaonbora ajak adenshia iba Arogo Pastor Rev.T.Toshi-i sentong akaba nung shisalen sarasadem aser tatem nung sayur Dr.Martemjen Dimapur Tsüngrem nem tenüingsang ajanga omen dak ajemdaker agüja yimsüsür ajaki külemi shisatsü lemsatop.

Dr.Martemjen-i omen dak ajemdaker yimsüsür kaji temburchi yimsüsür,ochishir, Longmisa yimtak Longmisa mapa meranga inyakba, Putu Yimsüsürtem temeja tazüokba akaba,nüktapangta shisatokden sentong tajung ka "Temelenshi Putu nung Yimsüsüba Pangdak" ta asüba yimya awashi tajung aketba, o omen nung ajemdaker longmisa Baptist Arogo-i ayongzüka kaogo. Longmisa yimtak tang ya Kosasanger Putu menden yimsüsüba putu lir aser tanu Longmisa Putu Yimsüsürtem Iba shisatokden sentong temeja shisatokden Putu tenzüka Longmisa Baptist Gaonbora ajak adenshia iba Arogo Pastor Rev.T.Toshi-i sentong akaba nung shisalen sarasadem aser tatem nung sayur Dr.Martemjen Dimapur Tsüngrem nem tenüingsang ajanga omen dak ajemdaker agüja yimsüsür ajaki külemi shisatsü lemsatop. Dr.Martemjen-i omen dak



February 17, 2024 nü Uttar Pradesh kübok Varanasi nung Congress lenir, Rahul Gandhi-i 'Bharat Jodo Nyay Yatra' agidang pa pusemertemi pa agizükba noksa nung angur.

Modi sorkar ya aluyimertem atema atakatem: Mallikarjun Kharge

New Delhi, February 17 (Agencies): Honibarnü Congress Tir, Mallikarjun Kharge-i tang aluyimertem Delhi arrtsülen longkak aitba atema Ato kilonser Narendra Modi-i aniba NDA teloktep sorkar sashia aitsüogo.

Sorkari aluyimertem longkak aitba tensa mazüokteter, aser ibaji ajanga nisung aika yirur aser aluyimertem taküm raksatsür, ta Kharge-i metetdaksü.

X ajanga Kharge-i, "Modi sorkar ya linük nung aluyimertem atema atakatem," ta metetdaksü.

Paisa, BJP asalentongtemji taila aser tiyazü

tenangzükbatem lir, "Modi-i nangzükbatemji taila" ta ashi.

Kharge-i, Centre sorkar metokmeperi ajanga tesüiba mapang nunga aluyimer 750 süogo; mezüing aluyimer 750 asü aser tang, yashi aluyimer ka süogo, ta metetdaksü.

Kharge-i, Modi sorkari aluyimertem ya tsükchirtem ama züingshir, "Congress-i dang parnok (aluyimertem) nem MSP legal temeden agütsütettsü!" ta metetdaksü.

Lok Sabha election agitsü mapang ana nung lia Kharge-i sorkar sashia aitsüdar.

Ano külen tanga osang ka nung, Honibarnü Rakest Tikait-i aniba Bhartiya Kisan Union

(BKU)-i Uttar Pradesh kübok Muzaffarnagar nung Mahapanchayat ka ayongzüka agiogo. Kidanger state tem nung aluyimertem ayongdentsü nükkidong nung iba sentong agi.

February 13 nungi tenzükä state balala nungi aluyimertem Delhi arrtsülen tanü agi anogo pongunübuba longkak aitogo.

Aluyimertemi sorkar dang minimum support price (MSP) akhangba den külemi aluyimertem aser alu nung aayangertem nem pension agüjang aser 2021 küm Lakhimpur Kheri nung aluyimertem menüingsetba ken o nung aibelenertem nem temerenshi agüjang, ta akhanger.

EAM Jaishankar aser Bangladesh Ato kilonser Hasina na senden amen

Munich, February 17 (Agencies): Honibarnü Munich Security Conference aliba mapang nung India External Affairs Minister, S Jaishankar aser Bangladesh Ato kilonser Sheikh Hasina na jurila senden ka menogo.

Iba senden nungji Jaishankar-i 'India-Bangladesh Maitri' atema Hasina-i melunga inyakba atema la dang pelaba lemsatöp.

Tesülen Jaishankar-i X ajanga, "Bangladesh Ato kilonser Sheikh Hasina ajuruogo. Lai maneni election nung takok anguba atema la nem tenüngsang agütsü. India-Bangladesh Maitri tejakleni aotsüsa lai inyakba atema la dang pelaba lemsatöpogo," ta

metetdaksü.

EAM Jaishankar-isa World Health Organisation (WHO) nung Director-General, Tedros Adhanom Ghebreyesus ajuru.

Tesülen Jaishankar-i X ajanga, "DG World Health Organization @DrTedros ajuruba atema pelar. Pa den sobaliba mozütem aser wara atema terenemshiba onük nung o lemtepogo. Kanga pelar Tulsi bhai!" ta metetdaksü.

Munich Security Conference aliba mapang nungsa Jaishankar-i US Secretary of State Blinken, UK Foreign Secretary David Cameron, German Foreign Minister Annalena Baerbock, Greece Minister of National Defence Nikos Dendias,

Argentina Foreign Minister Diana Mondino aser Canada Foreign Minister, Melanie Joly nungera ajuruogo.

Paisa European Union for Foreign Affairs nung tongti ketdangser aser EU Commission nung Vice-President, Josep Borrell Fontelles-a ajurua senden amen.

Munich Security Conference (MSC) 2024 ya February 16 nü tenzük aser February 18 nü tembangtsü. Iba senden ya Munich nung aliba Hotel Bayerischer nung ayongzüka agidar.

Iba senden nung tang alima nung security dak sendakba tebilemtsü onük balala benoka o lemtepdar.

95th HAPPY BIRTHDAY



18th Feb.1929

LANUMEREN JAMIR (Mangmetong.) Tsüingremi ano maneni anema aliba Noklangzüng küm Arishi moajangma ta Ojala, nü jala jabasotem & Semchirtem sarasadem lir.

Kamal Nath-i BJP den denra Congress MLA 12-ia BJP nung adentsü

Bhopal, February 17 (Agencies): Congress lenir aser taoba mapang Madhya Pradesh Chief Minister, Kamal Nath aser par jabaso Nakul Nath nati party toktsür BJP nung denra Congress MLA tem aser taoba mapang MLA tem 12-ia BJP nung adentsü, ta osang ka ajanga metetdaksü.

Kamal Nath aser par jabaso/Chhindwara nungi MP, Nakul nati BJP nung adentsü akok, ta tang jembidar. Taoba mapang Union Minister, Kamal Nath Honibarnü Delhi tonga ogo.

Ajisüaka Congress lenir tain, Kamal Nath-ibo iba dak sendakba osang kecha memetetdaksü.

Honibarnep Chhindwara nungi Congress MP, Nakul Nath-i X nung pa indang profile bio nungi 'Congress' agiena liasü. Congress MLA, Sajjan Singh Verma-ia social media nung pa indang profile nungi Congress logo agienogo.

BJP otongdar aser taoba mapang Kamal Nath indang media advisor, Narendra Saluja-ia taoba mapang Chief Minister Kamal Nath aser par jabaso na indang noksa ka lemsatöpa "Jai Shri Ram" ta metetdaksü.

Kamal Nath aser par jabaso

nati BJP nung denra tang Delhi nung BJP national convention tagidak mapang nung iba osangji sangdongtsüa akok.

Ano külen Congress lenir tain, Digvijaya Singh-i, Hokolbar aonung pai Kamal Nath den jembigo aser Nath-i BJP nung adentsü ta osang prokbaji tai, ta metetdaksü.

Singh-i, "Pai (Nath) yimtenren nung mezüing ajemokbaji Congress liasü aser Janata Party-i Indira Gandhi jail nung puokba mapang nunga pai Nehru-Gandhi kibong den liasü. Iba ama nisung ka jagi Congress aser Gandhi kibong toktsütsü asü?" ta ashi.

Osang angazükba agi, Congress-i Kamal Nath nem Rajya Sabha election nung tokteptsü atema ticket magütsüba agi pa jashir, iba denji külemi tawa Madhya Pradesh Assembly election nung Congress-i tamakok anguba sülen party bangdaki pa mezüingshiba atema pa mepelar.

MP assembly election nung Congress-i menden 66 dang anguba sülen Congress bangdaki Madhya Pradesh nung party tongti menden nungi pa agiena liasü.

Iba election nungji BJP-i menden 163 tashi nguteta liasü.

Sorkari MSP agütsütsü atema committee ka tentettsüa akok

New Delhi, Tsüklai/February 17 (Agencies): Tang aluyimertemi sorkar nem takhangba balala agüja longkak aitba mapang nung Centre sorkari MSP agütsütsü atema committee ka tentettsüa akok; iba committee nung züngsemtemji sorkar ketdangsertem aser aluyimertem organisations nungi lenirtem asütsü, ta osang ka ajanga metetdaksü.

Iba committee jagi Minimum Support Price (MSP) densema onük aika reprangshitsü.

Committee jagi aluyimertem organisations nungia züngsemtem jaoktsüa akok.

Aluyimertem takhangba onük balala asadangtsü atema sorkari state sorkartem nungi ketdangsertem aser aluyimba sector atema inyakba melungtet teloktem nungi züngsemtem

densema stakeholders ajak den o lemteptsü tebilemba lir, ta kasa osang ajanga metetdaksü.

Honibarnü aluyimertem lenir, Sarwan Singh Pandher-i, aluyimertem nem MSP agütsütsü atema sorkari oziung ka agizüktsüla, ta metetfaksü.

Punjab, Haryana, Uttar Pradesh aser Karnataka densema state balala nungi aluyimertem Punjab-Haryana arrtsülen Shambhu aser Khanauri points nung adenshir tanü agi anogo pongunübuba longkak aitogo.

Amongnüa Union minister tem- Arjun Munda, Piyush Goyal aser Nityanand Rai nungeri aluyimertem unions nungi lenirtem ajurua senden amentsü. February 8, 12, aser 15 anogotem nunga sorkar aser aluyimertem senden mena liasü saka telemteba kecha magitet.



February 17, 2024 nü Bharat Mandapam, New Delhi nung BJP National Council senden nung adentsü atema Ato kilonser Narendra Modi, Union Home Minister Amit Shah, Union Defence Minister Rajnath Singh aser BJP National Tir JP Nadda nunger arudang Chief Minister tem, Deputy Chief Minister tem aser Union Minister temi agizükba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, FEBRUARY (TSÜKLAI) 18, 2024

Temulung süa aliba taküm

Jangratema, tenük sünga aser pelapela aliba dang Ao o nung 'temulung süa alir' ta jembir. Ajisüaka, asenok asoshi alima nung teti temulung süa alitsübaji kanga tasak, ibayongji asenok aika temulung mesüi alir. Temulung süa aliba tetezü pelapela aliba süra temulung mesüi aliba tetezüji jashia dang aliba takümtem lir. Asenoki sen aika angudang temulung asür, ki tajung nung meshirangi chiyongtsü tajung den chiajema alidang kanga temulung süa alir. Asen mapa nung takok angudang aser tangari asen nung asangdang asenok kanga temulung asür. Ajisüaka, kodang asenoki bilemba ama alima rongsen majangzüktetter aser tangar menepa melitetter, idangji asenok temulung masür. Asenok makamaitba mapang aser shilumanem dang asenok taküm aser kibong temulung süa malir. Tangari asen nungsen jembiba angashidang aser atalatsü dang asenok kanga temulung masür. Aji oda, abensüoshi agi meperidang aser chiyongtsü agi anüngdang asenok temulung masür. Kinüngtsü aser kinüngboi asen aginütsüsa meinyakdang, mesüra taburtemi aseni imlaba ama takok bener marudang mesüra yimten, arogo aser loktii aseni imlaba ama meinyakdang asenok temulung masür. Atangji, itemji meimchir yimya. Iba jagi nisungtem teti pelaa melitetter. Ajisüaka, tenyari Paul-ibo tensa tia ajak nung pa temulung süa alitsü angazükogo ta Filipi tapu 4:11 nung shia lir. Ibaji jangratemtsüka, kechiyong alima nung teti temulung süa alitsü angazükba tetezüji kechi tensa tia arudir aruaka teti pelaa dang alir, teti tenük sünga dang aser teti temulung süa dang alir. Ibaji alima nung nisung ka asoshi tesüngmangtsü aser tenükshitsü taküm lir. Iba lima nung nisungtem tejak aser temulungjang reprangdangra temulung masüba agi sünga lir. Ki tajungtiba aser gari tajungtiba agia nisungtem temulung masür, kechiyong alima nung tetoktepba onsara aser anogo shi tasen-tasen aser tajungba-tajungba adoker. Aji oda, kodang asenoki asen taküm libaliro tangar den medemdangdir, asen dangbo tangar takarba aser tangar tajungba angur, iba jagi asen akaba aser asen nem moatsüba agi asen temulung masür, anungji mepelar. Ibaji asenoki Yisu Khrista dak amangba ajanga tensa tia ajak nung temulung süa alitsü mangazükba ajanga lir. Paul ya par nübertem madak yimten tashi tulu akaba nisung liasü. Tepuokdak timtema alibajia pa liasü. Ano, teloki pa tasütsüsa long agi aonba lendonga pai ajangshi. Atangji, alima nungbo yimten tashi tulu amshia merena alitsü akokba nisungji Paul ka liasü, saka kodang tanüla temeshii pa apu, pa tenüng, pa jakla aser temulung melen aser Yisu Khristaji alima meimchir temenen yong asü ta pai agizük aser kuli asütsü tenzük. Pa temulung memeyip dangbo anogo shia temulung masüba agi pa mulung sünga liasü. Teti tejashi nung pai Khristantem reshikangshi. Aji oda, pai metetba aser akaba ajak toktsür pai kodang Yisu Khrista sülen anidak, iba jagi pa peladaksü. Aji oda, Yisu Khrista sülen anidakba kija agi pa temulung süa aküm. Atangji, Paul teti temulung süa pelapela alibaji alima tensa mapang ajungba agi masü mesüra ajaki pa meimba mesüra tushiba agi masü, saka kechi tensa tia nung lidir liaka, paji Yisu Khrista den tesendaktep shitak yutetba ajanga liasü. Temulung süa aliba agi Tsüngremi asenok nem moatsüba madak asenok jangratema alir. Temulung süa aliba agi asenok tenükmerem nungi jenbur aser ajak den putepa litetter. Temulung süa aliba agi asen tasü itdaksür, kechiyong Tsüngrem asenok den lir ta asenoki meteta lir. Filipi tapu 4 nung Pauli yamai ashir, "kechi koda ajemzüka alitsü aji ni metet, aser kechi koda jenti kaa alitsü ajia ni metet--- iba miim oji ni angazükogo. Khristai shibai ni tashi itdaksür, pa ajanga ni ajak inyaksü akok." Asenoka Khrista dak amanger süra, tensa tia ajak nung temulung süa alitsü angazüksübaji kanga tongtibang. Iba jagi tatidang aika koktettsü. Ajisüaka, Laishibai ashir, teti temulung süa alitsü angazüksübaji 'miim o'. Tetezü, kanga nendaka bushi nung dang aser kanga mepishia asüngdang nung dang angutsü aser agütsütsü.

OLEMSABANG

Sensoka Temeden (Yabosameteta alitsüjunger)

- Mr. Imtiakum

Alima nung meimchir Temeden (Human Rights) Politically, Socially, Economically and Culturally United Nations Universal Declaration of Human Rights nung rajema shia angutsü, aji oda Linük balala nung pei pei lisopur asoshi Senso Temeden (Fundamental Rights) Temzüng nung wazüka lia liba liroa arur. India lima nung Indian Temzüng PART - III Arla (Article) 14 nungi 32 tashi nung Indian senso ka temeden wazüka yuja lir. Indian temzüng nung senso ka temeden tatsü agi yamai angatetsü akok.

- I. Senso ajak ozüng tsüngdang kesa dang.
- II. Senso tsüngda nung takar, tular, tamangba yimsü mesüra tetsür tebur bendanga mamshitsüla.
- III. Sorkar mapa nung tenzüktsü ajak asoshi temeden kesa.
- IV. Pei bilemba ozüng alema dang mesüra jembitsü aser lemsateptsü temeden.
- V. Senso ka Pa/la temeden asoshi nokdaktsü maong ka magutsüi temerenshi agütsütsü makok.
- VI. Tashiyim agi shinga mapa meinyakdaktsütsüla.
- VII. Tamangba yimsü pei amangnüba amangtsü asoshi temeden.
- VIII. Senso balala ajak indang sobaliba wazüka ayuba.
- IX. Linük nung ajema alir (Minorities) wazüka ayuba.
- X. Agüja aliba senso ka temeden nija mesüra lokti mesüra bangdak kari tanga item temeden anema inyakra, tematiba bangdak tashi (Supreme court of India) ajanga reprangshia temeden agütsütsü ozüng lir.

(Maneni asüng adok nung...)

SARASADEM TESEP KOMA ASÜ NUNG TAJUNGBA SÜLA

Rev. Dr. Limatula Lkr.

(Yashi adok nungi...)

Arogo nung lenisüba inyakyim (leadership structure) melenshitsüla: Kechiba sarasadem tesepe aika akümer? Prayer centre nung kechiba tetsür teimba kibur asür? Counsellortem teimba ka lay people nungi adoker? Iba yagi arogo nung lenisüba aser arogo inyakyim sayur ta metetdi. Iba ya structural and leadership crisis den sentaktepa lir. Asenok Baptist tamendakdak kimongji, Priesthood of all believers lir. Saka iba ya noklang nung noklangbo asenoki tang tashi meinyaktetter. Arogo nung class telemsa - takar-sensaker, tular-tilar tebandang kanga lir. Sensakertem lemtepe-lemra nung anasai maruteter, tekülem nung shilem agitsü peria mangur. Tetsür-tebur tebandang inyakyim nung ulura lir. Ao arogo nung tetsürtem arogo inyakyim nung sadema aita mali. Kudasür tetsür ta bilemba mulungsentsü ano temulungjang nungi metokoi lir. Prayer Centre nung free süa shilem agitsü mapang angur. Tang ABAM teinyakdak inyakyim nung ya women department aser Christian education dak alaka tetsürtem inyaksü kokteta leman lapokja lir. Zulu nung tebur dang agitsü ta mali saka tanga department nungjibo tang tashi tebur dang inyaka arudaki. Anungji leadership structure nungji temelenshi tajung marura, ashiko tangbo prayer centre dang lapoka aor- ako, saka tarutsü nungbo arogo balala pakzüka aotsü ana nung lir. Tanü prayer centre ya arogo nung leadership crisis temaitsü ka lir ta nibo bilemer. Iba temaitsü ya lendong ka ta meteta arogoi meinyakra, tarutsü nung tebilemetsü adoktsü ta metetdi.

O tembang

Iba ocet nung sarasadem tesepe aser tang arogo teinyakdak yimya anaprongla repa zuluogo. Ibai asen lima nung tongtibang tebilemetsü ka lir ta metetdi. Ajak ajungtsü mechi ajaki kulemi shisatsü agüja arogo aser sarasadem tesepe anaprongla yaritepa aotsü mapang tongogo. Süra tangatetep nung külemi Khristar tenzükba wadang bener aotsü. Anapronglai Tsüngrem mapa inyaker, nüburtem tajungtiba nung yaritsü meranger. Anungji sarasadem tesepe aser arogo tesendaktep tajung alitsü nungdaker.

(Iba ocet ya Ao Baptist Arogo Padum Pukhuri-i adokba Ranglok Kaket July 2021 Adok nungi agitetta adoktsür.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Telangana nung police-i Methodist Arogo ka nung züngsem 5 apu



February 14, 2024 nü Hyderabad nung Methodist Church of India nung tongti, M. A. Daniel den Khristan lenirtemi hospital nung amonger Khristantem semdangba mapang tangokba noksa nung angur.

February 17, 2024: Tawa Telangana nung aliba yimtsüng ka nung Methodist Arogo Tenla ki ka anasa gari lenmang ulushiba dak sendakba nung mangatettep adoka raraba sülen police-i iba Arogo nungi züngsem pongu densema nisung 21 puogo.

Telangana nung Ranga Reddy district kübok Janwada yim dak mangatettep adoka raraba dak sendakba nung February 15 nü police-i nisung aika puogo aser maneni nisung kar bushidar.

Methodist Church of India nung tongti, Bishop M. A. Daniel-i, "Police-i ozü züngsem pongu puogo aser Khristan 19 anema ken o benoka lir," ta metetdaksü.

Daniel-isa, February 13 nü Janwada yim dak Hindu nunger telok kati amakba mapang nungji Khristan 20 shi yirua liasü, ta metetdaksü.

Arogo dang masüngdangi gari lenmang ulushiba mapang

Arogo meyong li agisemtsü merangba agi Khristantem kanga jashia liasü, ta Arogo lenir kati metetdaksü.

Hindu nunger 150 shii amakba mapang nungji nisung 20 dak atema yiru, iba sülen telok anapronglai police nem ken o agüja liasü.

Tamalen Bishop Daniel-i, "Khristan 12 sorkar hospital nung mongdar aser parnok asembo kanga mejungi yirua lir. Khristan 9 bo hospital nung first-aid agiba sülenbo kidangi ogo," ta metetdakja liasü.

Paisa, "Iba mangatettep ya komaser adokar ni osang tejangja memetet, ajisüaka police-i bushisüngdangba ajanga kuli tejangja metettsü," ta ashi.

February 16, 2024 nü osangbener den jembidang Bishop Daniel-i, "Pua aliba Khristantemji chioktsü atema onoki court dang mepishitsü renemdar," ta metetdaksü.

Paisa, Hindu nunger lokti

jagi Tenla kiji raksatsü aser Khristan yimsü dak sendakba osettsüset aika raksatsüogo, ta metetdaksü.

Lokti jagi Tenla ki dak lung agi aonba ajanga kishi aser kichiba ajak raksa, ta paisa ashi.

"Ketdangsertemi tenokdangba benoka aliba agi ni iba yimtsüng m e s e m d a n g t e t e r . Teraksatsübaji koba tashika raksatsüar ni mejangja," ta paisa shisem.

Telangana State Christian Minority Commission nung vice-chairman, Shamkar Luke-ibo tai tonglokja alirtem apubaji pusema jembio.

Luke-i, "Aibelenertem jangjaba sülen sorkari temerenshi agütsütsü, ibaji ajanga dang tarutsü nung item ama tatalokba malitsü," ta metetdaksü.

Nütsüng million 35 aliba Telangana state nung nütsüng shilem 20 bo Khristantem lir.

Mumbai nung Khristantem dang asüngdangyaa survey agir: BCS

Mumbai, Tsüklai/February 17 (Agencies): Bombay Catholic Sabha (BCS) aser Citizens for Justice & Peace (CJP)-i, Mumbai aser Thane district na nung Maratha Reservation Survey agirtemi Khristantem dang parnok yimsü indang aser Khristan yimsü dangi meyipba indang asüngdangyar, ta metetdaksü.

Brihostibarnü Mumbai nung osangbenertem senden ka nung BCS aser CJP nung züngsemtemi, Goregaon East, Vikhroli, Gokuldhama aser Thane nung survey agirtemi Khristantem dang pei yimsü indang asüngdangba osang jangjaogo, ta metetdaksü.

"Maratha Reservation Survey agiba tenüng amer nisung kari app-based software ka amshia Maratha nungertem

asir Khristantem dang parnok yimsü aser Khristan yimsü dangi meyipba indang asüngdangyar, ajisüaka survey agirtem jagi parnok indang maittsübo mimshir," ta BCS aser CJP züngsemtemi metetdaksü.

BCS aser CJP nati, Mahim nung aliba housing society ka nung züngsem 56 lir saka survey agirtemi Khristantem aliba ki ka dang semdang aser parnokji building indang security kati meina liasü, ta metetdaksü.

"Iba building nung alisang jagi survey agisang dangji temelaba shidi sayuang, ta asü dang pa koda mesüi aküm aser idangyongjisa meyipa oadok. Ano tanga tatalokba ka nung, Gokuldhama nung Khristantem nem survey form ka agütsü aser form nungji

Maratha reservation indang shia lir, ajisüaka shilem ka nungbo tamangba yimsü aser kin asüngdanga lir. Ibaji nungdak mali. State sorkari iba maparen indang sangdongtsü onoki akhanger," ta BCS Tir, Dolphy D'Souza-i ashi.

CJP nungi Teesta Setalvad-i, Right to Information kübok Union Ministry of Home Affairs nem tasüngdangba aika agütsüba ajanga, 2015 küm sensotem den mangatettepi National Population Register (NPR) den Aadhaar linük ser liasü ta jangjaogo, ta metetdaksü.

"Registrar General of India-i Census agidang inyakba ama Database anaji sendakteptsü atema sensotem den tama asüngdangteptsüla," ta Setalvad-isa metetdaksü.

ANOGO ABEN TSÜNGREM DEN

Tamang Maten

Saka atsüayonga chira pa aitsür, kechiaser pai tamang agi machir, aser kechisa tamang agi masü aji temenen. Rome 14:23

Ibri shiti züluri tamang meteni Tsüngrem peladaksütsü makok ta zülu (Ibri 11:6). Kodangsa Tsüngremi langka jungkai adokdaksüdir, asenoki Pa dak amangtsü aser asenok yamaji alitsü Pai yimlar. Iba tetezü kechi? Iba tetezü asen nungdak ajak Pai agütsütsü ta asenoki amanger kechiaser Pai agütsütsü nangzük (Fil. 4:19). Iba tetezü timtem nungi Tsüngremi tajung adoktsütsü ta asenoki amanger (Rom 8:28). Iba tetezü koda masüba tia ajak asenoki koktetter kechiaser asen nungdak ajak Pa dangi bener arung ta Tsüngremi nangzük (Fil. 4:6). Iba tetezü taküm nung kechi atalokdir atalokang asenok kija masü Tsüngremi asenok kodanga mesentoker anungji shisa mebulur (Tazüng. 31:6). Iba tetezü asenoki kodanga Tsüngrem temeim nung marendaker (Yr. 31:3).

Khen khen asenoki asen tamang makaba temeten bushir. Tsüngremi kechi nangzük asenoki metet saka mapa nung, asen taküm nung balaka inyaktsü ta asenoki arendaker. Mepetmesü mapang nung asenoki shisa dang bulur aser iba timtem mapa nungi Tsüngremi kecha tajung matokdaksütsü ama dang bilemer. Asenoki asen nungdak nung yaritsü asoshi asen meketa alir ajak nungi teyari asüngdang aser asenoki ratetta ashir: "Tsüngremi kü nungdak agütsütsü ta ni metet, saka ni akokba tashi ni meranga inyaktsüla ta ni bilemer." Tsüngremi iba dangji tamang makaba ta ajar. Tamang makabaji temenen. "Tamang meteni Tsüngrem peladaksütsü tamakoktsü" (Ibri 11:6).

Chhattisgarh state nung pastor ka densema Khristan 8 dak azük

February 17, 2024: Tawa Kibuba tenzükba wadang Chhattisgarh nung metoktsür, ta ICC-i Khristantem tekülem sentong nung adenba sülen kidangi Iba tatalokba dak sendakba meyipa aoba mapang nung nung Khristan kati, "State telok kati parnok dak azük, ta International Christian Concern nungi Khristantem anema inyakba kanga bulua kümogo. (ICC)-i metetdaksü.

Khristantem kangashia tangartem Khristan yimsü dangi meyipdaksür, ta Hindu yimsü alia amangertem parnok nem tai tonglokja pastor densema Khristantem dak azük.

Tenük kuli alir kati, "Tekülem sentong tembangba sülen lokti jagi pastor den Khristantemji amokmeren; kobi melii yim daklirtem kar arusemba sülen parnok ajok amshia Khristantem dak azük. Tesülen emergency services nungi züngsemtem arua parnok hospital-i anir ao," ta metetdaksü.

Iba tatalokba nung pastor tamajungba yirua liasü. Pa tekolak aser teku mejungi yirua mapang talangka timtemdar.

Pa iba Arogo nungji küm aika tenzüka arudar, aser taoba mapangtem nunga pa dak aiben zükogo, ajisüaka pai maneni

Iba tatalokba dak sendakba nung Khristan kati, "State sorkar tasenba tentetba sülen nungi Khristantem anema inyakba kanga bulua kümogo. State nung Khristantem kodamasüba tensa ka nung lir, kechiyong Hindu yimsü alia amangertem dang masü saka sorkar balala kübok ketdangsertemia nütsüng ajema aliba Khristantem anema inyaker," ta metetdaksü.

Chhattisgarh nung sorkar tasenbai anti-conversion ozüng tesashiba benokba ajanga mapang shia Khristantem timtem ajurur.

United Christian Forum (UCF) report ajanga ashiba agi, yaküm India nung Khristantem anema inyakba tatalokba teimtiba aliba state ji Uttar Pradesh (tatalokba 155) liasü aser tanabuba state ji Chhattisgarh (tatalokba 84) liasü.

Nütsüng crore 2.55 aliba Chhattisgarh state nung Khristan nütsüng lakh 4.91 dang lir aser ibaji state nung nütsüng shilem 1.92 dang lir.

AO OSHI ANGAZÜKDAK:
TANÜ ANGAZÜKTSÜBA OJANG



Sobu

(v) temang nung süoshi semokba (dressing)

* Benjong nung nisung ajaki süoshi tasen sübu.

Sobutsü

(n) süoshi tapu balala (garments and ornaments)

* Naga nunger kin shia pei sobutsü balala agir.

OLONG PAITEP # 6701

	1			2			3		4
5							6		
7			8						
							9		
		10							
11									12
					13				
					14				
15									

TIPIEN

- 1. Balaka
- 6. Aika shirangba
- 7. Tar tatsü
- 9. Nenü'er jabaso
- 10. Sen latettsüba
- 11. Tangar kübok alir
- 14. Lon nung inokba
- 15. Tzü ayimdak
- 16. Ajok

LANGTSÜNGLEN

- 2. Hai sür inyak
- 3. Aor tenüing ka
- 4. Ali telungi talangka lur
- 5. Tebang kenyongi mazüoker
- 8. Ken atema anenzükertem
- 9. Toktepa noktak
- 10. Sen
- 11. Benjong agi
- 12. Telung nung rizünga ayu
- 13. Tebang nung enok

OLONG PAITEP # 6700 TELANGZÜBA


TIPIEN :

- 1. Tetsüingda
- 4. Aja
- 5. Tepin
- 7. Kinungtsü
- 10. Kishikina
- 12. Olulu
- 14. Lao
- 15. Mangayang

LANGTSÜNGLEN :

- 1. Tajak
- 2. Shi
- 3. Aginü
- 6. Anus
- 8. Nai
- 9. Tain
- 10. Kilem
- 11. Ajanga
- 13. Suy


NAI-A YA METETTER MA



Elon Musk-i aniba X Corporation-i December 26, 2023 nungi January 25, 2024 tashi nung India nung accounts 2,31,215 shibangtsüogo. Item account ya child sexual exploitation aser non-consensual nudity prokshitsü atema amshia liasü.

Elon Musk lenisüba kübok micro-blogging platform X-i temelenshi aika bener aru aser iba nung India nung kiralongraba ajungketsü atema amshiba accounts 1,945 agienba dena lir.

X Corporation-i reporting period mapang India nung account 2,33,160 tashi shibangtsüogo.



February 17, 2024 nü Meghalaya Governor Phagu Chauhan-i Shillong nung Meghalaya state assembly nung jembiba angur. Meghalaya sorkari 2028 küm tashi nung state GDP anasü agi teimba kümer 10 billion US dollars economy akümtsü alizüing lir ta Governor Chauhan-i ashi. NPP-i aniba Meghalaya Democratic Alliance (MDA) sorkari infrastructure, power, water supply, investment promotion, IT, tourism aser agriculture maparen inyakba ajanga alizüing atongtsü aser sorkarisa aluyimertem anasü agi teimba ajangzüksü atema alizüing lir ta Governor-i ashi.

Assam sorkari mapa lakh 1 agütsütsü nangzükba tatonger

Guwahati, February 17, 2024

(Agencies): Assam state sorkari mapa lakh 1 agütsütsü nangzükba ataloktsü ana nung dang lir ta Chief Minister Himanta Biswa Sarma-i ashi.

"Ozü sorkari mapa aika adoktsüogo aser lanrurtem nem mapa maongka agüja tashi itdaktsür" ta Chief Minister Sarma-i ashi.

State sorkari mapa aika

adokdaksüogo ta Assam Education Minister, Ranaj Peguia metetdaksü.

Higher Education kübok candidate 273 nem Assistant Professor indang appointment letters agütsüdang Minister Pegu-i iba osang lemsatop.

Tan mapa agütsüba züingsema Assam nung mapa 94,670 tashi agütsüogo aser iba ya state sorkari nangzükba ama inyakba

Minister Pegu-i mapa nung shimokertem dang bendanga agütsütsü aser Assam nung kaketshir nem quality education agütsütsü atema ayongzük.

Iba sentong nung Commissioner and Secretary Banashree Nath, Department of Higher Education Secretary Narayan Konwar aser tanga ketdangsürtem aden.

Ukhrul district nung ali acre 50 nung poppy lu raksatsü

Imphal, February 17, 2024

(Agencies): Manipur kübok Ukhrul district nung ali acre 50 nung poppy lu yima aliba raksatsüogo.

Indo-Myanmar arrtsü anasa Khamasom hill range nung tesüiba ghonda 36 tsüingda iba mapa inyak ta ketdangsürtemi ashi.

Ukhrul nung opium poppy alu ayimba anema mapa tulu inyaka

arur aser Manipur Police, 6th Manipur Rifles, Forest Department aser telok balala nungi volunteers külemi opium poppy alutem raksatsür.

"Tarutsü pututem nung drug-free society ka akümtsü atema asenok maneni longjemer inyakdi" ta Manipur Chief Minister N Biren Singh-i ashi.

"Khamasom hill range nung ali

acre 50 shi ka nung poppy lu raksatsüba ya drug trafficking aser illegal narcotics production anema inyakba nung tongtipang mera ka lir" ta CM Biren-isa ashi.

Tangkul Frontal organizations, Tangkul Churches aser Wung Tangkul Region (WTR) den külem inyakba mapa nung nisung aikati yaritepa arur.

Meghalaya CM-i Tura nung 'MegARISE' initiative tenzüksü

Shillong, February 17, 2024

(Agencies): Meghalaya Chief Minister Conrad Sangma-i February 17 nü Tura atema 'MegARISE' initiative tenzüksüogo.

Iba mapa ya KfW (German Development Bank) den yaritepa tenzükur aser West Garo Hills

district kübok Ganol catchment nung tenük yoka mapa inyaktsü.

'MegARISE' project ya catchment area nung mongpu melenshiba ajanga timtem majurutsü atema inyaktsüba lir.

Iba pilot project kübok Ganol Catchment nung Payment for

Ecosystem Services atema Chief Minister Conrad-i Rs 65.36 Lakh indang cheques lema agütsü.

Garo Hills region nung maneni mapa inyaktsü atema Chief Minister Conrad-isa 'Green Meghalaya' initiative kübok Rs 87.77 Lakhs indang cheques lema agütsü.

Kakching district nung BSF jawan ka yirutsü

Imphal, February 17, 2024

(Agencies): Manipur kübok Kakching district nung BSF jawan ka dak injang khaloktsü.

Honibarnü lendong nung yirubaji head constable Som Dutt (45) lir aser pa ya Himachal Pradesh nungi lir ta ketdangsür kati ashi.

Sugnu yimtsüing nung Dutt

tapupang abelen nung injang agi khashi. Pa nija mozü kidang anioka lir ta ketdangsürisa ashi.

Sugnu nung tesüiba anogo asem tashi prangpong amertemi makyonga arur. Hokolbar aonung medium machine guns amshia tenemtsüinglen nungi injang khaloktsü.

Bodbarnü prangpong

amertemi Sugnu yimtsüing amak aser idangji village volunteers-i parnok den khatop.

Yaküm May ita Sugnu nung ozüing alema mapa inyakba kanga atalok aser kiojen aika rongdoktsüba den nisung 5 tashi taküm sama. Iba ajanga Sugnu yimdaklir noklang aika relief camps nung jenok.



Assam Rifles aser Mizoram police yaritepa Lunglei nung Rs. 6.6 lakh alang heroin gram 173.2 apuba sülen agiba noksa angur. Lunglei kübok Chamari tesem nung alir Lalrinfela (36) aser Vanlalremi (47) na ket nung heroin bena lia apu. Tenati saponng pondang 16 nung heroin miima enoker bena liasü.



Russia nung opposition lenir Alexei Navalny nem tetushi agüja Lisbon nung Russia embassy kima nüburtemi temo melin aser naro toktsüba noksa nung angur. Arishi küm 47 tain Navalny ya tir Putin anemer rongnung tongtiba liasü. Pa Artic penal colony nung süogo.

Houthi teloki India-i oya aliba British oil tanker ka amak

Sana'a, Tsüklai/February 17 (Agencies): Yemen nung Iran den sendaktepa aliba Houthi teloki British oil tanker ka amakba sangdongogo. United States-i ashiba agi, Panama wako asonger aliba rong nung ya totzü bena liasü aser India-i oya aliba mapang amak. Gaza nung maneni mangatettep adoker aliba mapang tang iba lendong atalokogo.

Houthi telok military otongdar Yahya Saree-i TV nung sangdong ka ajanga Honibarnü ashiba agi, Temerem tzüyim nung Pollux tanker amaktsü atema navy indang missile tapet amshia liasü aser rong dak kanga junga kashiogo.

"Yemen kümzüka ayutsü aser Palestine nung pusema Yemen indang armed forces temi military inyakyim atsülangshia inyaksangshitsü atema kecha atidaka malitsü," ta Yahya-i ashi.

Ajisüaka Saree-i, rong ya koma raksa iba indang aser tanga osang tejangja kecha magütsü.

Hokolbarnü menor United Kingdom Maritime Trade Operations (UKMTO)-i, Yemen yimtiba Sanaa southwest len tzüküm nung aliba yimti al-Mukha (Mocha) nungi northwest len 70 nautical miles (130km) shi pilar 13:31 GMT nung iba lendong ya ataloka liasü, ta ashi.

Iba rong ya missile ka agi amak aser rong anasa apokba osang agütsüogo. Military keddangsurtemi telangzüba agütsüdar," ta UKMTO-i ashiba den rong nung mena alirtem ajak kümzüka lir ta metetdaksü.

US Department of State-i Hokolbarnü ashiba agi, Pollux, koba Panama wako asonger aliba oil tanker ka lir iba ya

India-i oya aliba mapang Yemen nungi khaloktsüba missile ka agi port tsütsülen kongshia liasü.

"Iba ya ozüng alema international shipping amakba tamaitsüka lir, koba anentsü atema alima kintemi aiben ayongzüka sülena Houthi teloki mangai inyaksangshia arudar," ta State Department otongdar kati ashiba Reuters news agency sangdong ka ajanga metetdaksü.

Houthi teloki taoba küm November tom nungi Temerem tzüyim nung shishilembaba minpronga arudar aser Israel-i Gaza amaka manen tashi ashi Gaza nung sabanga aliba Palestine nungertem nem teyari tonga bener motsü tashi maneni amaktsü ta tenangzüka agütsüogo.

British Foreign Minister David Cameron-i China dang iba dak sendakba nung jenjang agitsü atema ayongzüka mapang tang Houthi puri iba rong makogo.

UK Foreign Office-i sangdong ka ajanga ashiba agi, Cameron-i China Foreign Minister Wang Yi dang Hokolbarnü Munich Security Conference nung adenba mapang, Beijing aser Iran na tesendaktep aliba amshia Temerem tzüyim nung Houthi puri rongtem amakba anendaktsütsü atema nongshitsü shia liasü.

Taküm küm tetenzüklen US aser UK nati Yemen kübok governorates balala amak tenzüka sülen Houthi puri shishilemba dang amshiba rongtem dang masü saka US aser UK na indang warship aser rongtem maka arudar.

Kasa mapang nung US-i parnok jurila, fighter jet aser warship tem amshia Yemen nung Houthi pur tamendakdak

makogo, koba US Central Command (CENTCOM)-i ashiba agi, parnok kümzüka alitsü atema liasü.

US-i tatemsa Houthi telok tamendakdak amakba Brehostibarnü sangdongogo. US military-i mobile antiship cruise missiles asem raksatsüba metetdaksüogo, koba Temerem tzüyim nung rongtem amaktsü atema renema liasü, ta ashi.

"Item jenjang agiba ajanga tzüyim nung sadem sadema senzütsü atema temeden aliba kümzüka ayutsü aser US Navy aser shishilembartem rong international tzüyim nung tali tekümzüka kübok toktsütsü," ta parnoki ashi.

Tel Aviv-i southern Gaza nung Rafah amaktsü atema sentong yangluba anema nokdakaka, Israel nem bomb aser tanga hadir meyrejang aika yoktsü atema Washington renemdar.

Rafah yimti koba Egypt den arrtsü nung lir iba yimti nung Gaza kübok tesem balala nungi rara ajanga jenshir Palestine nung million 1.4 dak tema jenoka lir, aser iba yimti makra mepetmesü tali akümtsü ta shisabulua bilemer.

Japan-i H3 rocket takok ngua yokogo

Tokyo, Tsüklai/February 17 (Agencies): Japan-i, next-generation rocket orbit-i takok ngua yokogo, ta linük indang space agency-i metetdaksü.

Rocket yoktsü atema anaben tashi tamakok anguba ajanga anüing nung inyakyim balala atema Tokyo nükjidong aliba nung tetsükdaksü adaoka liasü.

H3 ya Honiabrnü anepdang 9:22 ako (Tokyo time) nung takok ngua ajungketa atu aser dummy satellite ka aser functioning microsatellites ana bener orbit-i ia liasü, ta Japan Aerospace Exploration Agency (JAXA)-i ashi.

Rocket takok ngua yoktetba

Jabaso asür Moatemsu Jamir Menungraa Bilemteter

Temeim Moa,
Nabo ano tang tashi kidangi meshilanger no! ta bilema azüngmeyaka alidang memeteti tanü küm rentetogo saka na Kibuba kidang alitsü onok tamang. Na mali onok temulung kanga rongjener.



Temeim Tsürabur & adianutem.

Feb. 18, 2023 - Feb. 18, 2024

Taoba Thailand PM Thaksin Shinawatra Deobarnü chioktsü

Bangkok, Tsüklai/February 17 (Agencies): Taoba Thailand Ato Kilonser Thaksin Shinawatra, shiba tepuokdak yua lir, pa Deobarnü chioktsü. Küm 14 dak tema bendanglima lia senzür linüki meyipa arur ita trok tsüngda pa chioktsü.

Honibarnü osangbenertem den sensaksema mapang Ato Kilonser Srettha Thavisin-i ashiba agi, Thaksin ya February 18 nü chioktsü aser inyakyim ajak temzüng ozüng dak ajemdaker inyaksangshitsü.

Thaksin nem iba hopta tetenzüklen parole agütsür liasü, ajisüaka pa kodang chioktsü iba indang osang tejangja memetet liasü. Deobarnü ya pa indang parole eligibility asoshi mezüngbuba anogo lir.

Justice Minister Tawee Sodsong-i iba hopta tetenzüklen, arishi küm 74 tain Thaksin ya taitok agütsüba tepuoker 930 rongnung densema alitsü, ta ashi.

2015 küm osangbenertem den sensaksema mapang chuba tilutsüba atema public prosecutors temi Thaksin anema ken o benoktsü asadangdar, ajunggi pa maneni ano timtem ajangshitsü akok.

Thaksin ya telecommunications business nung billionaire ka lir aser pai sorkar tashi ali amshiba atema pa August ita Thailand-i meyipa aruba sülen küm ti tepuokdaki yoktsü obendang agüja liasü. Ajisüaka Chuba Maha Vajiralongkorn-i pa küm ka dang

tepuokdak ayutsü atema taitok agüja liasü aser pa temang nung timtem aliba ajanga ita trok dang hospital detention nung yua liasü.

Pa kidangi meyipa aruba ya Pheu Thai Party aser pro-military party tem longjemer sorkar kümetta mapang ka nung tenchiogo aser iba ajanga pa tepuokdak mapang tatsüka dang ayutsü atema tenangzüktepba yanglu asütsü ta aikati bilemer.

Iba olulu osang adoker aliba mapang pa tepuokdaki ili ghonda ishika tsüngda temang majungba atemer police mozüki kati yokba ajanga iba olulu osang ya tali shisanga aküm aser pa tepuokdak mapang tatsüka danga intok mintok mejangja.

Local media sangdong balala ajanga ashiba agi, Thaksin teku nung timtem ka aliba aser iba den pa indang blood pressure kanga high akümba ajanga mozükidangi anir ao. Par kinungertem ashiba agi, pa ita ana tejangdang operation ana agir liasü.

Srettha ya Thaksin'er jala Paetongtarn Shinawatra-i aniba Pheu Thai Party nungi lir. Parnoki taoba küm May election sülen sorkar kümetta liasü. Iba election nung progressive Move Forward Party-i vote timba angu ajisüaka, military aser sobaliba dak sendakba nung tashi balala ajanga tenokdangba agütsüba ajanga parnoki sorkar mekümet.

sülen JAXA command centre nung inyakerkem pelatepa azütepba broadcast asüba mapang nguogo.

H3 indang microsatellite ana yagi lendongtsüdong balala nokdangtsü atema teyari agütsütsü aser factory tem inyakyim jenjang asadanga alitsü asoshi teyari agütsütsü.

H3, koba Japan indang flexible aser cost-effective flagship rocket ka lir, iba ya H-IIA melentsü atema yangluogo, koba 2001 küm nungi amshia aruogo.

H3, koba Mitsubishi Heavy Industries-i yangluba lir, iba ya anüing 6.5 metric tonne payload

bener atutsü atema design süa yangluba lir aser yokba shia yen billion pongu shi intoktsü, koba taoba rocket dang nungi tesadang agi tajemba lir.

Sen ishiba intokba den khu timba bener tutetba ajanga mapa balala asoshi alima kin balala atsüa arutsü imlaba JAXA-i lemsatepogo. Iba ajanga International Space Station-i khu yokba aser US-i aniba Artemis moon exploration programme amala nem teyari agütsütsü imlar.

Tokyo-i ashiba agi, parnoki 2030 küm tashi nungbo H3 rockets nung satellite aser probes 20 shi yoktsü sentong lir.

Khelo India University Games atema Nagaland renemer



Khelo India University Games dak sendakba nung co-ordination senden amenba mapang tangokba noksa nung angur.

Dimapur, Tsüklai/February 17 (TYO): Khelo India University Games Wrestling asaya atema Nagaland renemshiba mapang February 17 nü IG Stadium, Kohima nung co-ordination senden ka menogo. Iba senden ya Secretary, Youth Resources & Sports, Anthony Nguillie lenisüba nung agia liasü.

Iba asayamung ya February 22 nungi 26 tashi asayatsü.

Senden nung Nguillie-i asayamung dak sendaka alir ajak dang iba asayamung takok asoshi tajungtiba agütsüsü ayongzüka liasü. Paisa, national jenjang nung iba amala asayamung ka ayongzüka asayatsü atema maongka anguba ya state asoshi kanga tia taka lir ta ashi.

Senden nung senzüsenpong, tanendak, chiyongtsü, security aser tanga tenüngdakba

maparentem indang metetdakja liasü. Kasa mapang nung committee balala züngsemtemi parnok inyakyimtem indang metetdakja liasü.

Iba senden nung Sports Authority of India nungi züngsemtem densema Youth Resources & Sports, Transport, Power, PHE, Police amala sorkar department balala nungi ketdangsürtem shilem agia liasü.

Kohima nung half marathon takok ngua asemogo

Dimapur, Tsüklai/February 17 (TYO): Khelo India University Games 2023 (Wrestling) yongya ataba jeli sentong ka ama Honibarnü Kohima nung half marathon asemtepba ka ayongzüka asemogo. Iba asemtepba ya Phoolbari nungi High School Junction tashi asema liasü.

Khelo India University Games 2023 (Wrestling) ya Kohima kübok Indira Gandhi (IG) Stadium nung February 22 nungi 26 tashi asayatsü.

Honibarnü iba asemtepba ya KMC Administrator T. Lanusenla Longkumer-i tenzüka liasü. Lai iba asaya

ya northeast ajunga atema koda tongtibang indang metetdaksü. Wrestling asaya atema Nagaland ya host ka ama Longkumer-i, IG Stadium nung iba asayamung ayongzüka asayaba arua reprangtsü ayongzük, kong linük kübok university balala nungi asayar tajungtibatem shilem agiba angutsü.

Tetsür asemtepba Zerovi Resuh-i akok aser tanabuba aser tasembuba jenjang nung Z. Livani Ezung aser Pheangyu L. Konyak na liasü.

Tebur asemtepba Vihuka Assumi-i akok aser Peuhaulungsing o Sorito

Yimchunger na tanabuba aser tasembuba jenjang nung liasü.

Iba asaya nung takok angurtem nem KMC Administrator-i senpet aser kuli kaket agüja liasü. Tetsür aser tebur asemtepba nung takok angurtem nem senpet sen 5000, tanabuba aser tasembuba nem 3000 aser 2000 agüja liasü.

Half marathon asemtepba nung Don Bosco College, Mt. Olive College, Kohima College, Youth Resource & Sports department, aser KMC nungi asayartemi shilem agia liasü. Iba marathon nung asayar 31-i shilem agia liasü.

Asian Indoor Athletics Championships: Jyothi-i gold medal angu

Tsüklai/February 17, 2024 (Agencies): India tsür rongnungi asemteper Jyothi Yarraji-i, tang asaya aliba Asian Indoor Athletics Championships nung Honibarnü tetsür 60m hurdles nung alizüng 8.12s nung tongteta gold medal nguogo.

100m hurdles nung 2022 Asian Games silver medalist yagi taoba küm kasa tesem nung alizüng 8:13s nung tongteta tanabuba jenjang nung

tembanga liasü.

Arishi küm 24 tain asayar yagi la asayaba heat nung alizüng 8:22s nung tongteta la temaba jenjang nung liasü aser final asaya nung lai iba dang nungi tajungba asemteta la Japan tsür Asuka Tereda (8.21s) jakdang mezüngbuba jenjang nung tembanga liasü.

Iba asaya nung Hong Kong tsür Lui Lai Yiu (8:26) tasembuba jenjang nung liasü.

Jyothi ya 100m hurdles nung reigning Asian Outdoor champion lir. Lai iba asaya ya taoba küm Bangkok nung koka liasü.

Maneni lai Hangzhou Asian Games nunga 100m hurdles nung silver medal ka ngua liasü. Iba asayamung nung la mezüngbuba disqualify sütsür liasü.

Kasa mapang nung India tsürsa Harmilan Bains-i, 1500m event nung alizüng 4:29.55 nung tongteta gold medal nguogo.

Brazil team 2024 Olympics atema qualify masü

Tsüklai/February 17, 2024 (Agencies): 2024 Olympics qualifier nung Argentina goal 1-0 agi makokba sülen Brazil team taküm iba asayamung atema qualify mesütet.

South American Olympic qualifier nung Argentina team atema Luciano Gondou-i goal ka idakja parnoki asaya koka liasü. Iba team ya Javier Mascherano lenisüba nung asaya liasü.

Brigido Iriarte Stadium, Caracas nung iba asaya asayaba mapang minute 78buba nung Valentin Barco-i agütsüba ball ka Luciano-i Brazil goalkeeper Mycael adena tongokja parnoki asaya koka liasü.

South America nungi Paris nung asayatsü atema team ana shimer, koba July 24 nungi tenzüksü. Final group stage nung point tenet ngua Paraguay team temaba jenjang nung

tembanga liasü. Paraguay team-ia Brazil team koka liasü.

Qualifier nung Argentina-i point pongu ngua parnok tanabuba jenjang nung tembanga qualify süogo.

Brazil team 2004 küma tebur Olympic asayamung atema qualify mesüteti liasü.

Kasa mapang nung Argentina team-i tebur football asaya ya 2004 küm Athens aser 2008 küm Beijing nung kokogo.

BATC 2024: India tetsür team final-i iogo

Tsüklai/February 17, 2024 (Agencies): Malaysia nung tang asaya aliba Badminton Asia Team Championship nung India tetsür team-i 3-2 agi Japan akokba sülen final-i iogo aser medal kabosa angutsü jangjaogo.

Mezüngbuba asaya nung PV Sindhu aser Aya Ohori na asaya liasü. India tsür la yagi kanga meranga asaya ajisiüka Ohori-i mezüngbuba asaya ya 21-17, 22-20 agi straight set nung koka Japan team 1-0 agi tejakdang aküm.

Tanabuba asaya ya tarep asaya liasü. Iba asaya nung India team nungi Treasa aser Gayathri na Japan tsür Matsuyama aser Shida na den asaya liasü. Telok ana tsüngda kanga toktepa set asem tashi asayaba sülen Treasa aser Gayathri nati 21-17, 16-21, 22-20 agi asaya koka team ana 1-1 ta kasasa aküm.

Tasembuba asaya ya kija asaya tanabuba liasü aser

Ashmita Chaliha-i mimlai lia taoba world champion Nozomi Okuhara koka liasü. Chaliha-i iba asaya ya 21-17, 21-14 agi akok aser 2-1 ta India tejakdang toktsü

Ajisiüka Japan team-ia asaya odangbo memerangdangi toktsüsü tebilemba maliasü aser asaya pezübuba nung Miyaura aser Sakuramoto nati tarep asaya nung Sindhu aser Ponappa na 21-14, 21-11 ta straight set nung koka maneni team ana 2-2 ta kasasa aküm.

Team ana kati danga asaya amokbanga masayai kasasa asaya atuba sülen takoker bendangtsü atema asaya pongububa asayatsüsa aküm. Tatembangbuba kija asaya nung India team asoshi Anmol Kharb dak ajak keta liasü aser la Nidaira Natsuki den asaya. Iba asaya nung Kharb-i maneni kanga junga asaya aser lai asaya 21-14, 21-18 agi koka India team final-i iogo.

Nagaland Olympics & Paralympic Games: Kohima-i medal timba nguogo



Dimapur, Tsüklai/February 17 (TYO): Nagaland Olympics and Paralympic Games 2024 Honibarnü kanga takok ngua tembango.

Taküm iba asayamung nung Kohima district-i medal timba ngua parnok overall champion liasü. Parnoki iba asayamung asembuba atonga overall champion benogo.

Taküm Kohima district-i ajak senteper medal 89 angu, kong gold 35, silver 27 aser bronze 27 ngua liasü.

Tanabuba jenjang nung Chumukedima district liasü. Parnoki gold 24, silver 28 aser bronze 31 ngua ajak senteper medal 83 angu.

Tasembuba jenjang nung Phek district liasü. Parnokia ajak senteper medal 64 angu. Parnoki gold 22, silver 18 aser bronze 24 ngua liasü.

Kija asayartem ronung tetsürtem ronungi Peren district nungi Neshe Maonyu Konyak-i tajungtiba asaya gold medal ana ngua liasü. Lai 100 m aser 4x400m mixed relay nung gold medal ngua liasü. Lai 100m nu ng alizüng 13.89s nung tonga liasü.

Teburtem rongnung Mon district nungi Lhangti Konyak-i Sepaktakraw nung kanga junga asaya pa nem outstanding sportsman naroküm agüja liasü.

Maneni Chumukedima district nem Olympics Fair Play Trophy agütsü aser Longleng nem Spirit of Olympics Award agüja liasü.

Asayamung shibangba sentong ya Nagaland Angh La Ganesan aser Deputy Chief Minister T. R Zeliang nati moaja liasü.

BILEMDANGANG

"O aika jembiba dang nungi tagitsü o ka jembiba tajungba."